



1. Դարձերեսի դետալ պղնձե քիթեղիկներով (47)



2

Ք.Յ. 37 թ. ՄԻՋԱԶԳԱՅԻՆ ՊԱՅՄԱՆԱԳԻՐԸ ԵՒ ՀԱՅԱՍՏԱՆԸ

Յակոբ Յարութիւնեան

Ք.ա. I դարի վերջերին Արեւելքում եւ Մեծ Հայքում տեղի ունեցած բուռն իրադարձութիւններից յետոյ, այն է՝ Լուկուլիոսի, Պոմպէոսի, Կրասոսի եւ Անտոնիոսի արշաւանքներից յետոյ, Հաստատուեց յարաբերական անդորր: Կողմերը, կարծես թէ, ուժ էին հաւաքում, վերալիցքաւորւում՝ կրկին իրենց փոխյարաբերութիւնները բացայայտելու համար: Դա պայմանաւորուած էր ոչ միայն Հռոմի կողմից չափից աւելի մեծ ուժեր վատնելով, որը համարեա թէ նրան ոչինչ չտուեց, մասնաւորապէս՝ Հայաստանում իր գերիշխանութիւնն հաստատելու առումով, այլեւ բուն Հռոմի ներսում տեղի ունեցած արմատական փոփոխութիւններով եւ նրա վերականուցմամբ: Եթէ մինչ այդ Հռոմի՝ Արեւելք ներթափանցելու առաջին օրերից՝ Ք.ա. 190 թ. սկսած, նրա ազդեցութիւնն այստեղ աճում էր երկրաչափական պրոզրեսիայով, ապա Միհրդատեան պատերազմների ժամանակահատուածից սկսած հանրապետութիւնը հարկադրուած էր, իհարկէ, իր կամքից եւ ցանկութիւնից անկախ, վարել աւելի հաւասարակշռուած քաղաքականութիւն: Հռոմէացիները հասկացան եւ զգացին, որ արեւելեան ժողովուրդների հանդէպ պէտք է լինել առաւել ճկուն ոչ միայն պատերազմի դաշտում, այլեւ դիւանագիտութեան ասպարէզում: Այս ճեղքուածքներն առաջին անգամ իրենց գոյութեան մասին զգացնել տուեցին դեռ Լուկուլիոսի արշաւանքի օրերին, որը եւ դաս հանդիսացաւ արդէն նրան անմիջապէս յաջորդած Գնէոս Պոմպէոսի համար: Նա արեւելեան հարցերը կարգաւորելիս ցուցաբերեց նուրբ դիւանագիտութիւն, որն առաջին հերթին դրսեւորուեց Հայաս-

տանի եւ Պարթեւստանի հետ յարաբերութիւնները կարգաւորելու ընթացքում: Նա չդիմեց լուկուլիոսեան բիրտ միջոցներին եւ, յատկապէս Տիգրանի հետ միջպետական հարցերը կարգաւորելիս՝ դիմեց նոյնիսկ տարածքային «նուիրատուութիւնների» քաղաքականութեան կենսագործմանը: Նա Տիգրանին տուեց Ճորոխի աւազանի հարաւային շրջանները՝ ցանկանալով ձեռք բերել նրա վստահութիւնը, բայց այս ամէնը երկար չտեւեց: Պոմպէոսին յաջորդած Կրասոսն ու Անտոնիոսը կրկին վերադարձ կատարեցին լուկուլիոսեան հին մեթոդներին, ուստի պայքարը բորբոքուեց նոր ուժով, եւ սա յուշում էր, որ Հռոմը ապրում է ոչ միայն արտաքին, այլեւ ներքին գաղափարական ճգնաժամ: Անյայտ է, թէ ինչով կը վերջանար այս ամէնը, եթէ Հռոմում տեղի չունենար պետական յեղաշրջում, եւ իշխանութեան դեկին չյայտնուէր այնպիսի մի նշանաւոր պետական գործիչ, ինչպիսին Օկտաւիանոս-Օգոստոսն էր (Ք.ա. 27 - Ք.յ. 14 թթ.):

Նորաստեղծ Հռոմէական կայսրութեան հիմնադիր Օգոստոսը երկրի արտաքին քաղաքականութեան հիմնական սկզբունք հռչակեց *pax Roman-*ան, որի ամենակարեւոր տարրերից էր հանդիսանում՝ յարաբերութիւնների կարգաւորումը արեւելեան երկրների եւ պետութիւնների հետ:¹ Օգոստոս կայսեր որդեգրած քաղա-

1 Այս կապակցութեամբ տեղի մանրամասն տե՛ս Н. А. Машкин, *Пришествие Августа*, М. Л. 1949, passim; М. И. Ростовцев, *Рождение Римской империи*, М. 2003, էջ 9-29, 115-133; А. Б. Егоров, *Рим на грани эпох*, Л. 1985, էջ 25-37, 88-102; Дж. Бейкер, *Август. Первый император Рима*, М. 2003, էջ 273-297. Լ. Ստորեան, *Քաղաքական վերաբերութիւններ ընդ մէջ Հա-*

քական գիծը շարունակուեց նաև նրան յաջորդած Յուլիոս-Կլավդիոսների (Ք.յ. 14-68 թթ.) հարստութեան հիմնադիր Տիբերիոս կայսեր գահակալութեան տարիներին, սակայն նրա գահակալութեան ամենավերջում Արեւելքում տեղի ունեցան տարածքային նոր վերափոխումներ: Նոր գահ բարձրացած Կալիգուլա կայսրը վերականգնեց Կոմմագենէի թագաւորութիւնը, որտեղ թագաւոր ճանաչուեց Անտիոքոս III-ի որդին՝ Անտիոքոս IV-ը կամ Կոմմագենացին: Նոյնպիսի կարգավիճակ տրուեց նաև Փոքր Հայքին, որտեղ սկսեց իշխել Պոնտոսի Պոլեմոն թագաւորի թոռը՝ Կոտիսը, որը Պոլեմոնի աղջկայ՝ Անտոնիա Տրիփոնայի եւ Թրակիայի Կոտիս թագաւորի որդին էր: Այս երկու վերականգնուած թագաւորութիւններն էլ գոյութիւն ունեցան մինչեւ 72 թուականը: Ծագում է միայն մէկ բնական հարց. ի՞նչ նպատակ էր հետապնդում կայսրը, երբ այսպիսի բարեհաճ վերաբերմունք էր տածում մինչ այդ արդէն պետականութիւնը կորցրած այս երկու երկրների հանդէպ: Կալիգուլան ունէր, մեր կարծիքով, բաւականին խորամանկ եւ հեռուն տանող պլաններ: Հռոմն արդէն մէկ դարից աւելի էր, որ ապարդիւն պայքարում էր Արեւելքում իր տիրապետութիւնը հաստատելու համար, բայց կարողացել էր վերջնականապէս ամրապնդուել միայն Բալկաններում, իսկ որոշ վերապահումներով նաև՝ Փոքր Ասիայում: Արեւմուտքում Հռոմի ընդարձակման համար չկար այլևս եւ ոչ մի «կենսական» տարածք, քանզի նրանց գերիշխանութեան ներքոյ էին մինչեւ Իբերիա ընկած բոլոր հողերը, այս պատճառով էլ արտաքին քաղաքականութեան ծանրութեան կենտրոնը ամբողջովին տեղափոխուել էր Արեւելք: Սակայն այս տարածաշրջանում, չնայած

նրանց իրականացրած բոլոր միջոցառումներին, գործերը չէին դասաւորուում ակնկալիքներին եւ գործադրած ջանքերին համապատասխան: Ուստի անհրաժեշտ էր կրկին անգամ վերանայել իրականացուող արեւելեան քաղաքականութիւնը: Հռոմին այստեղ յատկապէս դիմակայում էին ինչպէս Հայաստանը, որտեղ մինչեւ դարի կէսերը կառավարում էին օտարազգի դրածոյ թագաւորները, այնպէս էլ Պարթևստանը: Այս խնդրին լիովին այլ մեկնաբանում է տալիս Յ. Մանանդեանը, երբ գրում է. «Կիսաֆէոդալական Կապադովկիայի եւ Կոմմագենէի՝ Հռոմէական նահանգների վերածուելը, հաւանօրէն, մեծ դժգոհութիւն էր առաջ բերել տեղական արտօնեալ ազնուականութեան մէջ, եւ կարելի է ենթադրել, որ Արտաւան Գ-ն, 36 թուին Կապադովկիա արշաւելուց առաջ, ոտքի էր հանել ու ապստամբեցրել այդ երկրները, որոնց մէջ ուժեղ էր իրանական տարրը: Եւ գուցէ հէնց այդ խռովութիւններն էին եղել գլխաւոր պատճառը Կալիգուլայի նոր քաղաքականութեան: Առանձնապէս ուշադրաւ է այն, որ Կլավդիոսը եւս, Կալիգուլայի յաջորդը, որը հետեւում էր Օգոստոսի եւ Տիբերիոսի քաղաքականութեանը՝ հարկ չհամարեց միացնել Կոմմագենէն եւ Փոքր Հայքը Հռոմէական կայսրութեանը, եւ այդ երկրները նաև նրա իշխանութեան ժամանակ մնացին իբրեւ առանձին թագաւորութիւններ»: 2 Ասուածին պէտք է յաւելել, որ նրանք իրականում Հռոմէական կայսրութեանը ենթակայ եւ կախեալ երկրներ էին: Փաստօրէն, կայսրութեանը կրկին անհրաժեշտ էր դիմել ժամանակաւոր դադարի քաղաքականութեանը, մինչ լիակա-

2 Յ. Մանանդեան, *Երկեր*, Բու. Ա., էջ 312: Այս հարցում վերջինիս համակարծիք է անել Ս. Տրեմեանը: Մանրամասն տե՛ս Ս. Տրեմեան, *Հայաստանը մախաթարեան-համայնական եւ ստրկատիրական կարգերի ժամանակաշրջանում*, - Հայ ժողովրդի պատմութիւն, Բու. I, Երեւան 1971, էջ 721-722):

յաստանի եւ Հռովմայ, 190-էն Վ. միջեւ 428 թ. հ., *համառոտ հայոց պատմութիւն այս շրջանիս*, Վեմետիկ, 1912, էջ 131-146 եւ այլն:

տար կ'ամրապնդուէին նրա դիրքերն Արեւելքում, մասնաւորաբար՝ Փոքր Ասիայում, քանզի այն, կարելի է ասել, որ դեռ միայն նուաճուել էր, բայց ոչ՝ «ամրապնդուել»: Չնայած այն հանգամանքին, որ Կալիգուլային պատմիչները ներկայացնում են միայն բացասական երանգներով³, հաշուի առնելով նրա անձնական կեանքը եւ վարքը, այսուհանդերձ, ուսումնասիրողների մօտ նա ստացել է միայն հակադարձ գնահատականը՝ ներկայացուելով որպէս խոհեմ եւ զուսպ պետական գործիչ: Նա, փաստօրէն, վերադարձ էր կատարում Ք.ա. II դ.՝ մեծ նուաճումների ժամանակաշրջանի հանրապետական գործիչների վարած արեւելեան քաղաքականութեանը, երբ նրանք առաջնորդուում էին կրտսեր դաշնակիցներին ապաւինելու սկզբունքին, որոնք էլ աջակցում էին Հռոմին ուժեղների դէմ գոյամարտում՝ չնայած այն հանգամանքին, որ Փոքր Ասիայի մեծագոյն մասը արդէն Հռոմի ենթակայութեան ներքոյ էր: Եթէ Ք.ա. II դարում այդ քաղաքականութիւնն իրեն արդարացրել էր, ապա Գնէոս Պոմպէոսի՝ Արեւելքում յայտնուելուց յետոյ, կարելի է առանց երկմտելու ասել, որ այդ հինը լիովին մոռացուեց: Պոմպէոսը ապաւինեց ոչ թէ կրտսեր դաշնակիցներին, այլ կարգաւորեց յարաբերութիւնները ուժեղներից մէկի՝ Տիգրան Մեծի հետ: Այս պատճառով էլ, ինչպէս նշուեց վերեւում, նա հիմնականում անձեռնմխելի թողեց Մեծ Հայքի տարածքը, եթէ նկատի չունենանք Մոփքի արեւմտեան հատուածի ժամանակաւոր միացումը Կապա-

դովկիային: Սակայն Տիգրանին իր դէմ չտրամադրելու նպատակով նա վերջինիս, որպէս փոխհատուցում, յանձնեց Ճորոխի աւազանի մի մասը, ինչպէս նաև՝ մի փոքրիկ հատուած Հիւսիսային Միջագետքից, այդ թւում նաև՝ Արուստանը⁴:

Կալիգուլան, ինչպէս նշեցինք վերեւում, 37 թ. տարածքներ նուիրեց նաև Փոքր Հայքին եւ Կոմմագենին, բայց, իր կամքից անկախ, շահողի կարգավիճակում յայտնուեց նաև Հայաստանի հիւսիսային հարեւանը՝ Վրաստանը, որն ստացաւ Սամցխէն եւ նրան յարակից շրջանները: Այս տարածքները նախապէս գտնուել էին Երուանդունիների պետութեան կազմում եւ հետագայում նուաճուել էին վրացիների կողմից, բայց Արտաշէս I-ը ազատագրել էր դրանք, երբ վերականգնեց Մեծ Հայքի թագաւորութեան տարածքային ամբողջականութիւնը: Այժմ կրկին, արդէն կուռախնձոր դարձած այդ նոյն տարածքները կայսրութեան միջամտութեամբ տրուում էին Վիրքին, որի սահմանները տարածուելու էին մինչեւ Սեւ ծովի ափերը: Հարցն այն էր, որ Հայքի համար բաւականին ծանր եւ դժուարին գործ էր իրենց ենթակայութեան տակ պահել Շաւշեթի եւ Ուլգարի լեռներից հիւսիս ընկած տարածքները, քանզի դա պահանջում էր մեծաքանակ ուժերի կենտրոնացում այդ շրջանում: Այս կապակցութեամբ Բ. Յ. Յարութիւնեանը նշում է. «Եթէ դժուար է ասել, թէ որոշակիօրէն ինչպէս էր անցնում երկու հարեւան երկրների միջեւ սահմանագիծը III դարի 70-ական թուականներին, ապա II դարի սկզբին, համաձայն «Քարթլիս ցխովրեբա»-ի, Մեծ Հայքի կազմում էր Սամցխէ գաւառը Դեմոթ բերդով, իսկ Ն. Բերձնիշուկու կարծիքով,

3 St'u Svetonij, Gaj Trankvill, *Жизнь двенадцати цезарей*, Калигула, 13-47, М. 2006: Tac, Ann, I, 1, 32, 41, 69, IV, 71, V, 1, VI, 3, 5, 9, 20, 32, 45, 46, 48, 50, Cambridge, Mass - L, 1956 (Loeb Classical Library): Կալիգուլայի մասին տե՛ս անտե՛ս Դ. Нони, *Калигула*, Ростов-на-Дону, 1998, էջ 211-319; К. Крист, *История восточных римских императоров, от Августа до Константина*, т. I, Ростов-на-Дону, 1997, էջ 272 եւ յաջ.:

4 Տեղի ունեցած տարածքային փոփոխութիւնների կապակցութեամբ մանրամասն տե՛ս Բ. Յ. Յարութիւնեան, *Հայաստանի պատմութեան ատլաս*, Ա մաս, Երեւան 2004, էջ 28-29:

սահմանն էլ անցնում էր այժմեան Դուրի գիւղի մօտակայքով: Ուստի միանգամայն հաւանական է կարծել, որ Դուրի գիւղից դէպի արեւմուտք ընկած հողերը՝ մինչեւ Ճորոխի գետաբերանի շրջանը եւ Սեւ ծովի ափերը, մտան հայկական թագաւորութեան կազմի մէջ»⁵: Հեղինակը նաեւ նշում է, որ դէպի Կատարգենէ-Կաղարջ գոնէ մէկ ճանապարհ, եւ ոչ թէ ճանապարհներ չլինելու պատճառով է, որ այդ տարածքը կա՛մ ետ է վերադարձուել, կա՛մ էլ, որ առաւել հաւանական է, Տիգրան Մեծը նուիրել է Պոնտոսի թագաւորութեանը⁶: Վերոյիշեալ երկու լեռներից զատ՝ այստեղ գտնուող եւ ուղղահայեաց ձգուածութիւն ունեցող Արսիանի լեռները եւս առաջ էին բերում մէկ լրացուցիչ դժուարութիւն՝ խանգարելով անխափան կապին, ինչպէս Լազիկէի եւ Սամցխէի միջեւ, այնպէս էլ այս երկուսի եւ Հայաստանի: Այս շրջանում էր գտնուում սահմանային Դեմոթամրոցը եւ Դուռն կամ Դուրի բնակավայրը, որոնցից վերջինը Ս. Տ. Երեմեանը կապում է ներկայիս վրացական Դուրի գիւղի անուան հետ⁷: Այս տարածքի մանրամասն նկարագրին մենք հանդիպում ենք Պտղոմէոսի մօտ, որը նշում է. «Հայքի՝ Եփրատ, Կիւրոս եւ Արաքս գետերի միջեւ ընկած հատուածի գաւառներն են՝ Մոսքական լեռների մօտ՝ Կատարգենէ, Բոքաս կոչեցեալներից վերեւ՝ Կիւրոս գետի մօտ, Տոսարենէ եւ Օտենէ, Արաքս գետի մօտ՝ Կոլթենէ, իսկ նրանից ներքեւ՝ Սողուկենէ, Պարիւադրէս լեռան մօտ՝ Սիրակենէ, Սակապենէ: Այդ հատուածի քաղաքներն են. Սալա՝ 73° 30', 44° 20', Ասկուրա՝ 74°, 44° 10', Բարազա՝ 75° 20', 44° 10', Լալա՝ 16° 10', 44°, Սանտուտա՝ 76°

5 Բ. Յ. Յարութիւնեան, Մեծ Հայքի Գուգարք աշխարհը ըստ «Աշխարհացոյց»-ի. ԲԵՂ, 1977, թիւ 2, էջ 179:
 6 Տե՛ս նոյն տեղում:
 7 Տե՛ս Հայ ժողովրդի պատմութիւն, հտ. I, էջ 720-721 (հեղ. Ս. Տ. Երեմեան):

20', 44° 2'0, Սատափարա՝ 78° 44', 20', Տոգա (կամ Օտա)՝ 78° 50', 44', Վարուրա (կամ Վաթուրա)՝ 73°, 43', Ազատա՝ 72° 15', 43° 15'»⁸: Այստեղ նշուած Ասկուրա բնակավայրը հէնց նոյն Դեմոթն է կամ Դուռնը⁹, որի մասին Պտղոմէոսը խօսում է նաեւ Ասիայի երրորդ քարտէզի այն հատուածում, ուր անդրադառնում է Իբերիային կամ Վիրքին: Նախ ուրուագծելով նրա սահմանները՝ պատմիչն, իր բնաւորութեանը համապատասխան, սկսում է թուարկել այդ տարածքի բնակավայրերը՝ քաղաքներն ու գիւղերը, որոնց շարքում է գտնուում նաեւ Սուրա տեղանունը՝ 75°, 45° 20' տեղադրութեամբ¹⁰: Սուրան, ինչպէս պարզորոշ երեւում է, հանդիսանում է Ասկուրայի կրճատուած կամ աղճատուած տարբերակը, որտեղ վերջինից սղուել կամ դուրս են մնացել Ա եւ Կ տառերը՝ այսինքն՝ առաջին եւ երրորդ:

Այս տեղանքը համընկնում է ներկայիս Վրաստանի Հանրապետութեան Սուրամիի լեռնաշղթայի եւ այստեղ գտնուող նոյնանուն բնակավայրի հետ, որը հնում յայտնի է եղել Արգուեթի կամ Լիխի լեռնաշղթայ անուամբ¹¹:

8 Claudii Ptolomaci Geographia, ed. C. Müller, Parisi tis, 1901, V,13, § 9-10
 9 Մանրամասն տե՛ս Բ. Յ. Յարութիւնեան, Հայաստանի պատմութեան ատլաս, էջ 32, 34, 38-39: Դուր բառի ստուգաբանութիւնը տե՛ս Լ. Աճառեան, Հայերէն արմատական բառարան, հտ. Ա, Երեւան 1971, էջ 684-686:
 10 Ptol, V, 11, § 1-2: Այստեղ անհրաժեշտ է կատարել միայն մէկ ուշագրաւ լրացում, քանզի § 3-ում նոյն հեղինակը խօսում է՝ նաեւ Սուրա անունով մէկ այլ բնակավայրի մասին, որի աշխարհագրական կոորդինատները նոյնն են, ինչ որ տեքստում նշուած Սուրայինը՝ 75°, 45° 20':
 11 Տե՛ս Աճառեան Թիրակացի, Մատենագրութիւն, թարգ. Ա. Գ. Արքայանեանի եւ Գ. Բ. Պետրոսեանի, Երեւան 1979, էջ 289. Ս. Տ. Երեմեան, Հայաստանը ըստ «Աշխարհացոյց»-ի (փորձ VII դարի հայկական քարտէզի վերակազմութեան ժամանակակից քարտէզագրական հիմքի վրայ), Երեւան 1963, էջ 39, 104. *Очерки истории*

Վրաստանի նկատմամբ ցուցաբերուած այս սիրալիր եւ բարեհաճ վերաբերմունքը չսահմանափակուեց միայն այս տարածքային նուիրատուութիւններով: Կայսրութիւնն համաձայնուեց, որ Պարթեւստանում իշխի Արտաւան III-ը, իսկ վերջինս էլ հարկադրուած էր դիմել զիջումների՝ Մեծ Հայքի գահակալին առնչուող խնդրում, քանզի Հայաստանի թագաւոր ճանաչուեց վրաց Փարսման արքայի եղբայրը՝ Միհրդատը¹²: Փաստօրէն, չունենալով այլ ելք, որպէսզի Պարթեւստանում ամրապնդի իր տիրապետութիւնն ու գերիշխանութիւնը, Արտաւանը հարկադրուած էր դիմելու այս փոխզիջմանը: Տարածքներ զիջելով Հայաստանի հարեւաններին ի հաշիւ վերջինիս ոչ միայն նրա հիւսիսում, այլեւ հարաւում, որի մասին կը խօսենք քիչ անց, Հռոմը, հաւանաբար ձգտում էր աւելի թուլացնել Հայաստանը: Ինչ՞ վերաբերում է Հայոց գահը օտար դրածոյին յանձնելուն, ապա, ըստ երեւոյթին, կայսրութիւնը ցանկանում է ապացուցել բոլորին, որ միայն ինքն է ընդունակ ապահովել Արեւելքում կարգ ու կանոն, ինչը կը նպաստի այս տարածքի զարգացմանն ու առաջընթացին՝ առանց աւելորդ ցնցումների եւ բախումների:

Մենք արդէն նշեցինք, որ տարածքային փոփոխութիւններ տեղի ունեցան նաեւ Հայաստանի հարաւային սահմանում: Այս առթիւ Յովսէպոս Փլաւիոսը գրում է. «Այսպիսով, Արտաբանէսը (խօսքը վերաբերում է Արտաւանին - Յ. Յ.) Ի-

Грузии, т. II, Грузия в IV-X веках, под ред. М. Д. Лордкипанидзе, Д. Л. Мусхелишвили, Тбилиси, 1988, էջ 87, 335, 391:
 12 Տե՛ս Օտար աղբիրները Հայաստանի եւ հայերի մասին, հ. 9, Հին յունական աղբիրներ, Ա. Յովսէպոս Փլաւիոս, Դիոն Կասսիոս, թարգ. Ս. Մ. Կրկեաշարեանի, Երեւան 1976. Դիոն Կասսիոս, LIX, 27, Յովսէպոս Փլաւիոս, Հրէական հնախօսութիւն, XVIII, 4, 5, Светоний, Калигула, XIV:

զատէսի (Ադիաբենէի թագաւորն էր 35-59 թթ.) օգնութեամբ, նորից հաստատուեց գահին, որից նա նախապէս հեռացուել էր մեծամեծների ձեռքով: Նա երախտամոռ չգտնուեց իր հանդէպ կատարած բարերարութիւնների հանդէպ»¹³: Մի փոքր աւելի ուշ պատմիչը թուարկում է այդ բարերարութիւնները, որոնց թուում էր նաեւ Իգատէսին. «...մի ընդարձակ երկիր պարգեւելը, այն վերցնելով հայոց թագաւորից: Այդ երկիրը կոչուում է Նիսիբիս, եւ այնտեղ նախկինում մակեդոնացիները կառուցել էին Անտիոք քաղաքը, որը կոչեցին Կալմիդոնիա: Այսպիսի պատիւներով Իգատէսը մեծարուեց պարթեւների թագաւորի կողմից»¹⁴: Այստեղ վճռական նշանակութիւն ունեցաւ ոչ միայն օգնութեան դիմաց փոխհատուցումը, այլեւ այն, որ պարթեւները եւս իրենց կողմից ցանկանում էին ճնշում գործադրել Մեծ Հայքի վրայ: Այսպէս, նա ցանկանում էր ցոյց տալ եւ ապացուցել, որ եթէ Հայաստանը այսուհետեւ չվարի պարթեւամէտ քաղաքականութիւն եւ դէմքով շրջուի դէպի Հռոմը, ապա իրենք եւս կարող են դիմել կանխարգելիչ, նախազգուշական միջոցների: Ինչ վերաբերում է Հռոմին, ապա վերջինս եւ ոչ մի կերպ չարձագանգեց այս տարածքային փոփոխութեանը:

Կալմիդոնիան նոյն Մծբինն էր, որը գտնուում էր Հայոց Միջագետքում եւ, ինչպէս վկայում է Փաւստոս Բուզանդը, Դ դարի մեր արքաներից Պապը՝ կրկին առաջ է քաշել այդ տարածքների հարցը, որպէսզի դրանք վերադարձուեն օրինական տիրոջը՝ Հայաստանին¹⁵: Իրականում անհաւանական է, որ Պապը այսպիսի յանդուգն

13 Յովսէպոս Փլաւիոս, XX, 66:
 14 Յովսէպոս Փլաւիոս, XX, 67: Այս կապակցութեամբ տե՛ս նաեւ Strabo, XVI, I, 23:
 15 Տե՛ս Փաւստոսի Բուզանդացու Պատմութիւն Հայոց, ի լոյս ած Գ. Պ., Ս. Պետերբուրգ, 1883, է, լր:

պահանջ ներկայացնէր հռոմէացիներին, ուստի սա, ամենայն հաւանականութեամբ, ժողովրդական մտածողութեան էպիկական արտացոլման արտայայտումներից կամ դրսեւորումներից մէկն էր, որն էլ ի վերջոյ «տեղ» է գտել Փաւստոսի շարադրանքում: Այս տարածքներն անցան Ադիաբենին, իսկ հետագայում՝ այստեղ գոյութիւն ունեցած յաջորդ պետութիւններին: Հայաստանի հարաւային սահմաններն այս շրջանում, այն է՝ Ադանիք նահանգի հարաւում, նախապէս հասնում էին մինչեւ Արեւմտեան Տիգրիսի ափերը, բայց չէին ընդգրկում նրա հովիտն ամբողջութեամբ՝ ձգուելով Հայկական Տաւրոսի հարաւային լանջերին ոչ թէ համարեա զուգահեռ, ինչպէս եղաւ հետագայում, այլ մինչեւ Մասիոս լեռները: Փաստորէն, Հայաստանի կազմում էր նաեւ Միջագետք Հայոցը: Այս տարածքներն իզատէսին գիջելով՝ դրանք հետագայում այլեւս երբեք չվերամիաւորուեցին Հայաստանին: Որ իսկապէս Մասիոսի շրջանը պատկանել է Հայաստանին, սկսած ամենաուշը Երուանդունիների ժամանակներից, որոնց պետականութեան վերաբերեալ, իրաւացիորէն վկայում է նաեւ Ստրաբոնը: Խօսելով ձմռան ամիսներին Կովկասի անանցանելիութեան մասին եւ, թէ ինչպէս կարելի է այն յաղթահարել նա գրում է. «...ինչպէս անում են Ատրպատականեան Մարաստանում եւ Մասիոս լեռան վրայ՝ Հայաստանում»¹⁶: Իր հետագայ շարադրանքում նա նաեւ յիշատակում է Մասիոսի տարածքում գտնուող (էպի) Միգդոնիա քաղաքը: *Ἐπι-Μυγδονία* քաղաքի անուանումն ունի հետեւեալ ստուգաբանութիւնը. *ἐπί* նախդիր է եւ հին յունարէնում ունի բազմաթիւ իմաստներ, որոնք բոլորն անհնար է թուարկել, բայց բերելով ընդհանուր յայտարարի, կարելի է ասել, որ ունի վրայ, գէր, մերձ, հետ իմաստ-

ները (ուռերէն *на, над*)¹⁷: Այս ամէնը ստեղծում է այն տպաւորութիւնը, որ էպիմիգդոնիան կառուցուել է Միգդոնիայի հարեւանութեամբ՝ նրանից հիւսիս եւ կամ էլ, ի տարբերութիւն առաջինի, նրանից աւելի բարձրադիր վայրում, իսկ ծայրայեղ դէպքում եղել է Միգդոնիայի արուարձանը:

Ինչ վերաբերում է Ադանիքի եւ Կորճայքի հատման տեղանքից հարաւ ընկած տարածքներին, որ առաւել յայտնի են նաեւ Ծաւղէք անուամբ, եւ որը չպէտք է շփոթել Արցախի Ծաւղէքի հետ: Վերջինիս մասին յիշատակում է Պտղոմէոսը՝ այն անուանելով Սոդոկենէ¹⁸: Ս. Տ. Երեմեանի կարծիքով հարաւային Ծաւղէքի տարածքի պատկանելութեան հարցը միջագետքի դիւանագիտութեան խնդիր է դարձել դեռ մեր կողմից վերելում յիշատակուած 37 թ. պայմանագրի ստորագրման օրերին: Ըստ նրա՝ այդ պայմանագրով Ծաւղէքը, Հայոց Միջագետքը եւ Արուաստանը, որոնք միասին կազմել են շուրջ 18 հազ. քառ. կմ տարածք, տրուել են իզատէսին¹⁹: Ս. Տ. Երեմեանի այս տեսակէտը հերքուել է պատմաբան աշխարհագրագէտ Բ. Յ. Յարուլթիւնեանի կողմից: Վերջինս, մատնացոյց անելով Պտղոմէոսի վկայութիւններից մէկը, որը մեծապէս լրացնում է արդէն վերելում մեր կողմից օգտագործուած Յովսէպոս Փլաւիոսի վկայութեանը, յանգում է լիովին հակառակ տեսակէտի: Իսկ Պտղոմէոսն այդ առթիւ գրում է. «Այսպիսով նա (խօսքը վերաբերում է Մեծ Հայքին - Յ. Յ.) իր սահմանները տարածում էր ընդհուպ մինչեւ Ադիաբենէն: Այս կողմից

17 Ст'у И. X. Дворецкий, Древнегреческо-русский словарь, т. I, М. 1958, էջ 598-600, Словарь иностранных слов, под ред. А. Г. Спиркина, М. 1987, էջ 584:
 18 Ст'у Ptol, V, 13, § 9:
 19 Ст'у Հայ ժողովրդի պատմութիւն, Բ. I, էջ 719. Ս. Տ. Երեմեան, Հայաստանը ըստ «Աշխարհացոյց»-ի, էջ 40, 71, 86:

16 The Geographyp of Strabo, L. 1960, XI, V, 6.

շրջափակուած լինելով լեռներով՝ նա լայնութեամբ տարածուում էր ձախից, Արաքսի վրայով՝ մինչեւ Կիւրոս գետը»²⁰: Այստեղից ամէն ինչ առաւել քան պարզ է, քանզի պատմիչ աշխարհագրագէտը նկատի ունի Տիգրիսի ձախ եւ աջ ափերը միասին վերցրած: Սրանցից առաջինը, փաստորէն, դարձել էր սահմանագիծ Մեծ Հայքի եւ Ադիաբենէի միջեւ: Այսպիսով, եթէ մինչեւ Ք.յ. Ա դարի սկիզբը Մծբինը նոյնպէս, իրեն յարակից շրջաններով, հանդիսանում էր Մեծ Հայքի անբաժանելի մասերից մէկը, ապա, այդուհետեւ այն նախ ընդգրկուեց Ադիաբենէի, իսկ աւելի ուշ՝ Պարթեւական թագաւորութեան կազմի մէջ: Բ. Յ. Յարուլթիւնեանը նշում է. «Այլ խօսքով, Տիգրիսը սահման է հանդիսացել Մեծ Հայքի եւ Միջագետքի միջեւ այն մասում, որտեղ Եփրատը թեքում է դէպի արեւմուտք: Եղած տարբերութիւնների լոյսով բնաւ էլ չի երեւում, որ Ծաւղէքը մաս է կազմել Միգդոնիա-Արուաստանի: Այն 37 թ. յետոյ էլ շարունակել է մնալ Մեծ Հայքի կազմում՝ մաս կազմելով Կորդուք-Գորդիւենէ աշխարհ-գորավարութեան»²¹: Ծաւղէքի պատկանելութեան հարցը՝ կրկին հրապարակ հանուեց նախ 298 թ. Մծբինի, իսկ ապա 363 թ. պարսկա-հռոմէական «ամօթալի» հաշտութեան պայմանագրերի ստորագրման օրերին:

Հայոց Միջագետքի հայկականութեան վերաբերեալ ուշագրաւ վկայութիւն է հաղորդում նաեւ Մովսէս Խորենացին, երբ գրում է. «Բայց թիկունս առնելով Երուանդայ զհռոմայեցիս՝ ոչ ինչ վտանգի ի թագաւորութեանն Վեսպասիոս եւ Տիտոսի, թողով ի նոսա զՄիջագետս: Եւ յայնմ հետէ բարձաւ իշխանութիւնն Հա-

յոց ի Միջագետաց, եւ հարկս եւս առաւելագոյնս տայր ի Հայոց Երուանդ: Իսկ գործակալացն Հռովմայեցւոց մեծապէս հանդերձեալ զքաղաքն Եդեսիայ՝ ի նմա հաստատեն զտունս գանձուց հարկացն ժողովելոց ի Հայոց, ի Միջագետաց եւ յԱսորեստանեայց: Եւ ժողովեն ի նմա զամենայն դիւանս, եւ կարգեն դպրոցս երկուս, մի՝ զբունն իւրեանց զԱսորին, եւ միւս եւս զՅոյնն, եւ զդիւանն հարկաց եւ զմեհնականն, որ կայր ի Սինոպ Պոնտացւոց՝ անդր փոխեն»²²: Խորենացու այս վկայութիւնն, ունենալով ժամանակագրական անճշտութիւններ, այսուհանդերձ, չափազանց ուշագրաւ եւ հետաքրքիր է, կարօտ առանձնայատուկ մեկնաբանութեան: Եթէ իրար ենք միացնում 37 թ. պայմանագիրը եւ, ապա Վեսպասիանոսի (69-79 թթ.) ու նրան յաջորդած Տիտոսի (79-81 թթ.) կառավարումները, ապա 37 թ. մինչեւ 69-ը, իրարից բաժանում է ընդամէնը 32 տարի, որ Խորենացու դէպքում, կարելի է համարել հանդուրժելի, քանզի Պատմահօր երկասիրութիւնն ընդգրկում է անյիշելի ժամանակներից մինչեւ Ք.յ. 428 թ. ընկած ժամանակշրջանը: Այսպիսի երկարածիգ ժամանակագրութեան դէպքում, սխալն առաւել քան հաւանական է: Եթէ պէտք է պարզաբանել, թէ ինչ կապ այստեղ ունի Երուանդը, ապա կարելի է կատարել միայն ենթադրութիւններ: Մեր կարծիքով, այստեղ իրար են միացուած, միահիւսուած պատմական երկու իրադարձութիւններ: Դրանցից առաջինը վերաբերում է Երուանդ Դ Վերջինին, իսկ միւսը՝ 37 թ. տեղի ունեցած իրադարձութիւններին: Երուանդը, հաւանաբար, Սելեւկեանների ռազմատենչ եւ նուաճողական ցանկութիւնները զսպելու նպատակով, նրանց է գիջել Հայոց Միջագետքը, որը եւ էլ աւելի

20 Ptol, VI, 9, § 26.
 21 Բ. Յ. Յարուլթիւնեան, Մեծ Հայքի վարչա-քաղաքական բաժանման համակարգն ըստ «Աշխարհացոյց»-ի, մաս Ա, (Արեւմտեան եւ հարաւային աշխարհներ), Երեւան 2001, էջ 298:

22 Մովսէս Խորենացի, Պատմութիւն Հայոց, քնն. բնագիրը Մ. Արեւիտանի եւ Ս. Յարուլթիւնեանի, լրաց. Ա. Բ. Սարգսեանի, Երեւան 1991, Բ, 10:

է լցրել ժողովրդի համբերութեան բաժակը: Չի կարելի բացառել, որ դա նաեւ դիւանագիտական քայլ էր նրա կողմից, որպէսզի կարգաւորէր յարաբերութիւնները Անլեւկեանների հետ, ինչպէս նաեւ ստանար նրանց մօտ գտնուող մանկահասակ Արտաշէսին²³: Նա, կարծես թէ, կանխազգում էր, որ վաղ թէ ուշ՝ Արտաշէսից իրեն վտանգ է սպառնալու, ուստի, հաւանաբար, ցանկութիւն ունէր նրանից ազատուել Ֆիզիկայէս: Փաստօրէն, Պատմահայրն իրար է միացնում պատմական մի քանի իրադարձութիւններ, որոնք կատարուել են Երուսաղէմի վերջինի ժամանակներից սկսած մինչեւ Վեսպասիանոս եւ Տիտոս կայսրերի կառավարման տարիները: Ինչպիսի մեկնաբանութիւններ էլ տանք այս դէպքերին, այսուհանդերձ, դրանց հիմքում ընկած են նաեւ Ք. յ. 37 թ. համաձայնագրի հետ առնչուող դէպքերը, որով Մեծ Հայքը տարածքային անդառնալի կորուստներ է ունեցել նաեւ իր հարաւարեւմտեան սահմանազլխին:

37 թ. պայմանագրով Հայաստանից ապօրինաբար վերցուեցին ոչ միայն տարածքներ, այլեւ երկրի թագաւոր ճանաչուեց կայսրութեան դրածոն, օտարազգի Միհրդատ Փառնաւազեանը: Նոյնիսկ 69-66 թթ. հայ-հռոմէական պատերազմից յետոյ, այս երկու երկրների միջեւ յարաբերութիւններն այդչափ լարուած եւ սրուած չէին, ինչպէս այժմ, քանզի կայսրութեան հակահայկական քաղաքականութիւնը ունէր խիստ ընդգծուած բնոյթ: Այս մասին, այդ թուում եւ՝ տարածքային որոշ փոխհատուցումների, մենք արդէն նշեցինք վերեւում:

Իրադրութիւնն արեւելքում կրկին թէժացաւ եւ լարուեց, չնայած մինչ այդ եւս բաւականին բարդ եւ հակասական էր, երբ 41 թ. սպանուեց Կալիգուլան, եւ կայսր հռչակուեց Կլաւդիոսը (41-54 թթ.): Փաստօրէն, Հռոմը կարողացաւ միայն ժամանակաւորապէս հասնել յաջողութեան, քանզի ի վերջոյ Մեծ Հայքում հաստատուեցին պարթեւ Արշակունիները:

ՅՈՎՀԱՆՆԷՍ ՕՃՆԵՑԻ. ՍԱԿՍ ԺՈՂՈՎՈՑՆ, ՈՐ ԵՂԵՆ Ի ՀԱՅՍ
(Գիտա-քննական բնագիր)

Ալեքսան Յակոբեան

Յովհաննէս Օճնեցի կաթողիկոսի (717-728 թթ.) «Սակս ժողովոցն, որ եղեն ի Հայս» վերտառութեամբ յայտնի երկը գրուել է Մանազկերտի ժողովից յետոյ, այսինքն՝ 726 թ. յաջորդող երկամեայ ժամանակահատուածում, ինչպէս այդ մասին նշուում է հէնց նրա բնագրի որոշ կտորներում: Հեղինակը սկզբում համառօտ թուարկում է իրենից առաջ Հայաստանում տեղի ունեցած վեց կարեւորագոյն եկեղեցական ժողովները, ապա մանրակրկիտ ներկայացնում ասորի վարդապետների մասնակցութեամբ Ապահունիք գաւառի Մանազկերտ «գիւղում» իր գումարած ժողովում քննարկուած հարցերը եւ դաւանական յարակից խնդիրները:

Երկի առաջին մասում Յովհաննէս Օճնեցու շարադրած նիւթի մեծ մասը աղբիւրագիտական իմաստով եզակի է: Թէպէտ հեղինակի տեղեկատուութիւնից դուրս են մնացել այլ սկզբնաղբիւրներից յայտնի բազմաթիւ ուրիշ կարեւոր ժողովներ (օրինակ՝ Կարինի (շուրջ 530 թ.), Դուինի (607 եւ 645 թթ.) եւ այլն), սակայն, միւս կողմից, ըստ հուշեան, միայն նրան ենք պարտական Հայաստանում Գրիգոր Լուսաւորչի կողմից Նիկիայի տիեզերական ժողովից յետոյ, այդպէս նաեւ՝ Ներսէս Մեծի կողմից Կոստանդնուպոլսի, իսկ Սահակ Պարթեւի ու Մաշտոցի կողմից՝ Եփեսոսի տիեզերական ժողովներից յետոյ ազգային ժողովների գումարման վերաբերեալ եզակի հաղորդումների համար:

Ի դէպ, նշուած ժողովներից առաջինի թուագրումը՝ Նիկիայի տիեզերական ժողովից (325 թ.) յետոյ եւ Լուսաւորչի քահանայապետութեան «Ի» (քսաներորդ) տա-

րում (այդպիսի թուագրում է տալիս նաեւ Հայ քաղկեդոնական պատմական աւանդոյթը ենթադրաբար Ը դարում ամփոփած «Նարրացիո»-ն), միայն առաջին հայեացքից է թուում հաւաստիութիւնից հեռու (325/6-20=305/6): Եթէ ենթադրենք, որ «Ի» ընթերցումը կարող էր առաջ գալ գրչական մի բաւական տարածուած սխալ վերծանութեան արդիւնքում՝ նախնական «ԲԺ» (=երկուտասան) թուից, ապա դժուար թէ հնարաւոր լինի պատահական համարել այս վերականգնուած թուականի ճշգրիտ համապատասխանութիւնը Կեսարիայում Գրիգոր Լուսաւորչի եպիսկոպոսական ձեռնադրման ժամանակին (325/6-12=314): Դա, ըստ Հ. Պօղոս Անանեանի վերջնական ճշգրտման, տեղի է ունեցել Լուսաւորչի քահանայանալուց (Վիրապից դուրս գալուց յետոյ՝ 311/312) մօտաւորապէս երկու տարի անց՝ 314 թ. աշնանը: Իսկ սա յուշում է Յովհաննէս Օճնեցու ձեռքի տակ գրաւոր սկզբնաղբիւրի (գուցէ անգամ՝ ժողովական փաստաթղթի) եղած լինելու ենթադրութիւնը, որը հնարաւոր է տարածել նաեւ յաջորդ՝ 381 եւ 431 թթ. յետոյ տեղի ունեցած երկրորդ եւ երրորդ ժողովների վերաբերեալ հաղորդումների վրայ:

Շահապիվանի (444 թ.) եւ «Քաղաքուղաշտի» (506 թ.) ժողովների յիշատակութիւնից յետոյ հեղինակը բաւականին մանրամասն ներկայացնում է վեցերորդ Դուինում 554 թ. Ներսէս Բագրեւանդացու գումարած ժողովը (որի ընդունած փաստաթղթերը պահպանուել են «Գիրք թղթոց»-ում եւ «Կանոնագիրք Հայոց»-ի մեծ խմբագրութեան տարբերակներում), ինչպէս նաեւ հանգամանալից փնովում 632

23 Նոյն տեղում, Բ, լէ-լմ: